

澤雅堂詩二集

澤雅堂詩二集卷五目錄

與嚴紫卿夜話二首

僧窗夜雨圖爲繩之觀察題

有作

送嚴紫卿權稅巴里坤

冬旱三章

偶作

周雲先太守自湘奉檄度隴謁相國於酒泉同居
戎幕數月將返蘭州參劉太僕軍事作此以送
丁丑

陶方之秦州書來出私錢築隄三百丈爲民捍水
隄北築室三楹祀宋荔裳先生先生順治閒備
兵是州地震城圯破貲修之祀之以從民願也
送方小泉希孟出塞並懷蕭敬孚上海

崇陽馮孝婦詩

憂旱一首

大風

留退菴

孔繡山畫蘭爲訥安太守作

卽事三首

秋感十二首

送譚古潭還鄉

秋風

先太宜人諱日晝然有述

白髮

四絕句

書家書後

丁丑九日陪湘陰相國北崖登高

馮竹儒觀察燦光去官出塞迎其尊甫尹平先生

遺骸歸葬嶺南作詩送之

苦寒

卽事贈籽山

春寒

戊寅

有作二首

黃烈婦詩

送餘菴星使福裕赴青海任

澤雅堂詩二集卷五

烏程施補華均父著

與嚴紫卿夜話二首

萬里同爲客孤燈各憶家邊愁催白髮秋色負黃花待
雁胡天迴親人漢月斜遙知小兒女吹管學鳴笳
何處蓬萊閣蛟鼉蹴怒濤乘槎會天使憂

國到吾曹北極星辰黯西征士馬勞營門試長望積雪
萬山高

僧窗夜雨圖爲繩之觀察題

揚州城外屯貔虎揚州城裏穴狐鼠揚州城北僧廬中

讀書夜夜聲淒苦誰家兄弟此下帷尙書諸孫刺史兒
關塞連天羽毛短僧廬暫作鷓鴣枝秋雨瀟瀟晚同被
阿兄無眠蹴弟起窗燈黯淡鵠鵲鳴熟書背誦如流水
廚中無米難及晨飢腸輾輾迴車輪吹燈蒙被忽不語
門外官兵驚捉人齧膚蟣蝨爬沙久可憐衾枕堆塵垢
明朝赤腳踏淤泥相約村南看阿母我昔避賊吳江濱
脫粟白哺高堂親讀書深夜攪人睡詈罵頗耐東西鄰
廿年人事何堪說兄已持麾弟持節官齋殘雨滴空階
還似孤兒夜嗚咽媿我鞞紋滿面生拋書萬里學從征
憑公領略僧窗味不把長檠換短檠

有作

陰雲飛揚寒日死老烏啞啞嘯不止三間土屋門向西
薄晚尖風射眸子酒煖鑪溫強自寬戰場西望雪漫漫
裂膚墮指陰山下多少遺黎泣夜寒

送嚴紫卿權稅巴里坤

萬竅呼號北風發陰山雪片大如席軟裘快馬何丈夫
揮手出關天地白問君安所往權貨陰山隅雄師日夜
逐驕虜要憑物稅資軍須于闐美玉皆琮璧大宛名駒
流汗赤火州吉貝一丈花輕軟勝裘滑宜帛爲問乾隆
普爾錢輸入公家幾騰格何況漠南漠北皆蒙古白帽

回回更分部卡倫外接俄羅斯饗飡共飽牛羊乳牛羊
之乳參餅茶有如侑飯供魚蝦馬馱車載出中國此利
百一歸公家君不見劉晏江淮鹽君不見蘇轍均州酒
國計民生賴士人權利不落屠沽手有酒有酒君一醉
願君黽勉公家事煥采溝邊侯獲碑閒來爲我摹殘字
冬早三章

天翁衰老不記事仲冬猶未藏陽氣野人土屋相嗟喟
無冰無雪蝻子多明歲蝗蟲棲麥穗

茅檐野雀鳴聲融融煖日舒羽翰甯知旅客憂冬乾
明年民飢少禾麥爾肉微薄焉足餐

此方八月卽飛雪今年十月氣燥烈青天高高白日出
十人五病聞呻吟脣乾舌敝肝腸熱

偶作

四十二年如石火八千餘里傍兵塵黃雲莽莽時驅馬
白日悠悠不待人官送厯書驚歲改客遺鄉味感情親
故園兒女應思我頗怪朝來作噫頻

周雲先太守自湘奉檄度隴謁相國于酒泉同居戎幕
數月將返蘭州參劉太僕軍事作此以送

丁丑

謂君文弱君能武一旅當關殪豺虎謂君武猛君最文
十年閉戶窮典墳居山眞識讀書好謀身祇念耕田老

偶因知遇許馳驅豈有功名亂懷抱祈連山下初逢君
襟袖猶帶瀟湘雲白羽遙隨右丞相金城還佐後將軍
折衝不在懸河口迂生兵甲胷中有詩書更欲活西戎
蓑笠依然夢南畝別語躊躇感我懷石田茅屋足安排
自攜神劍尋雷煥不爲邊功萬里來

陶方之秦州書來出私錢築隄三百丈爲民捍水隄北
築室三楹祀宋荔裳先生先生順治閒備兵是州地
震城圯破貲修之祀之以從民願也

秦州使君彬彬儒春來寄我軍中書書言山水苦汜溢
波濤盪激南城隅使君衙齋日高坐忍視民與魚蛇俱

築隄捍水古人有給以財粟民爭趨千畚萬鍤墟里出
應役不待官追呼公錢那如私積便使君清俸良有餘
頻年節儉致此物爲民破散非虛儲歸裝異日祇盈擔
囊無可探篋不胫洪流欲奔隄忽阻三百餘丈何回紆
沿隄種柳復成列長條漸活稊初舒子弟欣隨陶刺史
父老還思宋大夫順治中年秦地震崇墉摧墮如廢墟
大夫出資民盡力樓堞屹屹成須臾大夫築城山賊沮
使君築隄波臣吁好官爲民民頌說工作相類心無殊
長隄以北啟祠宇祠前桃杏栽百株方池鱗鱗風織水
菖蒲綠映紅芙蕖蠶叢魚腹十年亂大夫宦迹淹榛蕪

至今錦水淨如練士女知薦芬芳無山猿夜嘯溪水合
殘魂落月應羈孤驂螭恍惚倘來下刑牲擊鼓猶歡娛
使君真繼大夫後持蓋日日行泥淤他年子弟作父老
談往涕淚同霑襦潮州刺史祀百世視今視昔民所圖
萊陽詩伯有靈爽試問吾語當何如

送方小泉希孟出塞並懷蕭敬孚上海

嘉峪關前路君來亦可悲黃雲隨殺氣紅柳發春枝儒
服從人笑邊功到我遲戈鋌森萬帳慷慨與論詩
君詩如小雅忤側有哀音長揖杜陵叟千秋知此心秋
風四時勁夏雪萬山深驅馬燉煌北邊愁入夜吟

蛟龍繞佩刀武事及吾曹鳴鏑傳軍令前鋒鏟賊濠文
章飛檄貴勳業坐謀高君看高書記翩翩擁節旄
蕭生東海上白髮與年新試問從軍樂何如蕢字貧塞
鴻聊寄信邊草不知春曉卧春申浦應疑作噫頻

崇陽馮孝婦詩

崇陽李氏女嫁作馮家婦入門性婉孌事姑如事母姑
年逾七十老矣柳生肘空牀倚呻吟聲懷色昏黝醫曰
法不治巫曰命難久潰裂蛆蠕蠕婦急吮以口生兒苦
貧賤執業覓升斗娶婦託養姑姑疾婦當咎人肝足起
死斯語閨中受深宵四鄰靜缺月耿疏牖下階拜且泣

牆壁風瀏瀏戶靈奔婦前竈鬼唬婦後霜刀凜芒鋸血
熱肝新剖衣襟重約束水赤洗雙手和湯進姑飲痛癢
忽無有姑誇藥神聖婦諾但垂首明朝鄰嫗來賀姑干
萬壽倉卒見創痕咄咄驚而走四方漸聞知敬式及令
守東家有悍妻房闔作獅吼對婦汗如濯侍姑顏忽忸
剖肝期活姑姑活天勿負甯知宇宙閒奇孝稱誰某我
今作此詩傳述良有取持吟閭巷中婦道因之厚

憂旱一首

祈連陰崢嶸六月或飛雪地氣東而西淒寒變炎熱炎
熱卽爲災亢旱憂心結初春望甘澍愁眼榴花節蒸雲

稍凝聚揚颿隨散滅天高不可呼驕陽赤如血蠅蚋逐
人飛螭蝗穿地出春疫四野多秋饑萬家必吁嗟邊鄙
氓蕉萃那堪說側聞晉鄭郊天時尤酷烈麥根久枯死
得雨難再發村村競逃荒道路泣嗚咽夜來飢卧人豺
狼齧其骨官吏幸相存一飽千事畢男兒生理窮往往
意決裂探囊與揭竿變亂有倉卒蛟龍胡不仁偃蹇守
幽窟沉茲山澤靈牲醴享豐潔覲然無報稱尸位罪應
罰我亦杞人愚賦詩心激切珍羞堂上餐愧汗對流溢

大風

大風西南來洶若江河奔塵埃塞天地白晝倏已昏空

中蓬藿枝吹從何處村東西任飄轉未得歸其根鳥飛
驚跼跼走嗟跋跋千營聲靜寂但見旌旗翻偶與二
三子一室相笑言山川方震盪欲以觀所存癡奴飽粗
飯猶是渾沌民齟齬出牆壁熟睡怡心魂動捷與衝孔
瞋目無顛眊

留退菴

男兒行萬里其意各有求今君敝腰腳直爲萬里遊陰
山崢嶸雪弱水瀕洞流茲游足奇偉安居笑不休自來
鯤鵬心難語蜩與鳩萬里有故人勸君少淹留譬若湖
江寬中著一葉舟終當就隄岸未可隨沈浮高才磊落

懷一身誠恥謀甯知謀身拙謀世亦未優況君將四十
茂樹凌清秋歸根漸有時落實宜早收裹飯適蒼莽道
與夸父侔一朝鄧林化哀哉君誰尤

孔繡山畫蘭爲詒安太守作

舍人道光末素髮敲華簪偶然數尺絹自寫芬芳心疏
花露氣溼密葉煙痕侵安知筆墨化如見沙石新秦岱
從東來巖壁青千尋斷崖若剖瓊流水如鳴琴老孔家
此閒香草爲比鄰靈風抽美箭獨媚山中人含馨每自
遠結根方在深清氣十指出窈窕圖其眞涇陽卅載後
獲之球琳珍低徊羽檄旁若作猗蘭吟蕭艾嗟已化幸

此孤芳親奇芬吐空壁拂拂霑衣襟

卽事三首

昨夕陰山下茫茫雪水來穿畦疑過雨敲枕誤聞雷氣
潤麥花吐影搖蘆葉開明朝萬峰頂漸失白皚皚

蕭蕭酒泉郡上相駐旌旗要使能罷士無忘畎畝時菜
花黃繞壘瓜蔓翠侵池莫道公侯貴頭銜老圃師

流民今已返廢堡鬱相望投牒朝爭水鳴鉦夜捕蝗荒
年誤婚嫁生計半牛羊南望高昌郡烽煙百戰場

秋感十二首

山雨四更歇邊秋七月深無端情感慨不盡氣蕭森靜

數嚴城析塞思故國砧書生晚投筆猶識出師心
昔我

純皇帝開邊土馬雄百年非舊物諸將又奇功蒲海波
全定莎車路漸通珠崖休擬議今古事難同

莽莽

神京北穹廬萬里遙永爲甥舅國長戴子孫朝貴種王
公繼腴疆畜牧饒忍令回紇馬諸部逐塵颿

奇熱高昌郡交河似沸湯蔽天蝗失捕連野稼無傷物
害知將息師和召此祥劇憐軍吏苦流汗計芻糧

尉犁城外戰將士盡如飛遠道還移粟前軍合寄衣澤

荒鴻雁聚秋老駱駝肥饋運休辭瘁今朝振

國威

納土猶延命麀兵竟失機未蒙王會列徒載帝昶歸烏
集夷人壘民瞻漢將旂玉河清淺水帶血洗征衣

花門飄忽甚善走學飛廉兵事憂流寇天心快聚殲外
援終斷絕分守各森嚴湯網寬無極逃亡尙不嫌

零落纏頭族亡歸亦可嗟竄身迷賊窟回面向

天家翠麥連畦穗黃棉繞屋花從今出幽谷再睹日光

華

聞道烏孫國俄夷尙駐兵甘言求互市妄意占名城和

好盟猶重侵欺釁亦輕請從空壁上看滅賊縱橫
昔歲干戈擾諸邦府庫虛軍儲猶暫急邊患幸長除援
手須金粟深心託簡書老成憂

國計繞室夜躊躇

遠想豺狼盡新開郡縣雄奇材出湘澧舊德望岐豐萬
國方通市諸邊更徙戎和俞善方術終苦藥囊空
四十頭全白吾生亦太勞閒情仍筆硯奇氣忽弓刀眼
見西戎定身依北斗高還從學農圃他日老煙皋
送譚古潭還鄉

勞人滿乾坤來往各心事孰是澹無營遨遊適吾志古

潭生騷鄉懷抱與今異破吻出新詩時帶荃蓀氣大兒
卽田功老妻識書味我貧樂未央愚哉希富貴平生登
臨興常恐老將至春來雙赤腳吟遍戎荒地探囊詩百
篇山水富才思深含太華色洶挾長河勢空同鬪崢嶸
浩皚與奔恣祈連太古雪六月襲襟袂點筆酒泉城字
字瑤花墜西上嘉峪關萬里望烽燧軍聲振莎車殺氣
靜蒲類番休士卒樂遞運芻糧備而余曼胡纓臨邊佐
元帥嘯歌媿昔娛摹畫傷今瘁雄心騏驎騁肅令熊羆
衛何來雪色鶴絕塞發清唳刷羽塵沙中飲啄難爲累
來乘邊風和去逐邊風厲雲霄顧視哀擾擾人間世還

山木葉下瀟湘渺無際灑落知誰同羈絆默自懟何當
洞庭波扁舟容放意蕭蕭斑竹交涸涸崇蘭瘁尋君吟
詩聲入林還把臂

秋風

鄉國八千里秋風思殺人笑顰看世態俯仰失吾真養
拙堪山澤違時自賤貧嵇康龍性在天矯或難馴

先太宜人諱日盡然有述

富貴不逮親浮雲我何有萬里邱隴違此出悔已久淒
淒茲晨屈惻惻乃心疚軍中忌長號銜哀在心口顯名
矧未獲先德或終朽吾親示疾初阿貽繞牀走呻吟就

阿貽時時摩其首奄忽十二年阿貽知念否倘隨癡叔
肩涕泣奠雞酒音容存彷彿幸有八十舅事舅如事親
望我閨中婦朝日城頭烏啞啞哺其母我生已無及對
爾增慚負

白髮

白髮已如此青山猶未歸秋風數行雁萬里忽南飛老
淚哀時落初心混俗違何時泛茗雪重著菱荷衣

四絕句

曠蕩無羈一野人無端長揖傍冠巾座中賓客忽不樂
爲怪語言多任真

昨宵夢到弁山麓
仰看山勢高千盤
巉崖仄嶺從容過
覺比人間途徑寬

大樹扶疏陰四垂
啾啾羣鳥莫相疑
東西轉眼各飛散
共在枝頭能幾時

雙龍之劍橫我牀
鱗甲含怒時開張
自歌自哭無人問
邊月荒荒秋夜長

書家書後

九遷身外事百態
眼中人不仕吾猶貴
還鄉夢最眞道
宜藏澗壑天未厭
烽塵寄語深閨婦
牽絲作釣緡

丁丑九月陪湘陰相國北崖登高

北崖猶憶擁旌旄戰士如雲鏖賊壕

同治十二年萬里相國平肅州

指揮沙漠定一樽談笑雪山高恨無寒菊迎遊騎喜有

清泉濯佩刀戎政要觀秋令肅肯隨詞客競題糕

馮竹儒觀察煖光去官出塞迎其尊甫尹平先生遺骸

歸葬嶺南作詩送之

歸化城西路今時話昔時

竹儒前出歸化城迎喪值寇亂至大庫倫而返兵戈

連大漠天地泣孤兒晚睹游魂滅深悲負骨遲頻年憂

國計猶可九泉知

絕域多羈鬼啾啾語夜闌一官如敝屣萬里覓遺棺有

子天無負還鄉死亦安麻衣方涕淚風雪玉門寒

苦寒

昨夜天四更北風如筆策風顛雪飛舞奇寒集空室壁
燈青欲死鑪火紅不活側身刺蜎縮衾裯冷逾鐵朝來
雪新霽矮窗浮凍日臨案屈五指崛彊不受筆硯田一
寸冰滴水呵勿出作書色黯淡著紙聲窸窣口鼻忽若
蒸鬚鬚俄已結鴉吻乾愈悲狐腋煖全奪卻想涇渭交
今秋驕旱魃禾頭盡枯槁一穀未能割飢民十萬戶面
瘦眼流血暫飽尙末期何由計衣褐吁嗟道路閒誰收
凍死骨星海冰崢嶸更念西征卒合圍溫宿城誓滅諸
回鶻霜霰浩漠漠宵半哀笳發揚旌驚指墮磨刀歎膚

裂土甌飯乍香瓦盆酒初熱牛心炙通行羊胃爛堪撥
賓朋足飲啖意象破蕭瑟淒淒號寒蟲亦有霄壤別笑
指祈連山評量中夜雪

卽事贈耒山

紅旗獵獵朔風顛奇捷頻聞遠塞傳

時官軍收復西四城

忙裏尙

餘詩興好坐中唯覺醉人賢飛黃意氣今猶在垂白頭
顛絕可憐最是滿天笳吹發雪花如掌送殘年

春寒

戊寅

輭裘無奈峭寒何點筆題詩手屢呵礪雪尙含春後凍
邊風肯放夜來和五更殘夢思鄉國三月晴漪照綺羅

兒女家家隨上塚峴山亭外泊船多

有作二首

天地無窮期人生百年少舉以殉其名毋乃喪我寶古
人守淡泊耕釣可終老乘時任將相大事因之了區區
沒世稱永暇挂懷抱如何叔季才苟出輕吾道彪炳談
事功功成道已小茲游經萬里余亦爲名擾晚知役物
誤默識養真好作書寄妻孥來歲歸耕早

大鵬徙南海培風久回旋鸞鳩決榆枋亦復矜高鸞小
大焉足辨彼各游其天鵬鳩況無常變化時所然神龍
寄目中一髮形蜿蜒安知挾雷雨掉尾重雲閒莊生憚

爲犧龜曳甯獨賢寓形隨所遇所貴天能全進亦任三公退亦受一廛遙遙隆中人相望千載還

黃烈婦詩

兒已有夫兒與夫居夫病室中令兒躊躇兒已無夫兒

與夫俱夫歸地下待兒須臾解一兒欲殉夫尊嫜止之尊

嫜哀兒兒生何爲兒欲殉夫父母止之父母哀兒兒生

何爲解二肅肅秋風淒淒夜雨幽幽空幃慘慘獨語茫茫

重泉相從何所黃氏寡妻沈氏處女解三兒甯父母兒別

尊嫜兒有弟妹兒心憐傷人苦日短兒苦日長兒背弟

妹萬愁攪腸解四朝飾公車暮飾公車問父何之遙遙京

華待父歸來兒歸兒家待父不歸兒病咨嗟

解五

兒叔有

子兒夫有子啞啞呱呱承夫之祀璀璨文祿勞我鍼指

嗟我夫婦父爾母爾

解六

兒病不足醫兒死不足悲兒與

夫別久今日是見期孤魂飄揚黃氏之室黃氏之堂兩

兩爲鬼長相依忍棄尊嫜兒罪當治父兮母兮爲兒致

此辭

解七

南山可移東海竭日月光光自西出夏雪如掌

冬雷疾兩翼四足人類滅夫婦大義方斷絕沈女號天

志專一嗚呼噫嘻詩有述

解八

送餘菴星使福裕赴青海任

二月已過東風微酒泉城外春雪飛使君別我向青海

銅符錦節生光采青海地茫茫異族各分部駕馭自有方使君聽我語旃裘君長東西盟世興

天家均舅甥胡土克圖佛苗裔牛羊飽噉長誦經跳刀走戟爭禮拜呵晴呪雨偏神靈賜之顏色助爲理教以周孔甯知聽羌兒戎女通市貿喜則爲人怒爲獸獸人不失獸性情搖尾依依隨指嗾指嗾難施搏噬狂埽穴焚林在其後相期弧矢揚威靈依然且網容疏漏青海浩蕩青際天煌煌祀典昭恭虔穹龜長魚作神使昂頭受享波濤間千驍橐駝走沙磧王公助祭來後先戎羌雜遝觀如堵

聖朝威德君所宣況今輪臺南北無征戰溫宿烏孫皆
郡縣區區青海誰傳箭使君坐鎮定從容分襟盡此千
觴勸

澤雅堂詩二集卷六目錄

陪相侯東郊課耕

夜不成寐有懷故鄉諸子

城東

寄吳子常

送王耔山赴疏勒二首

登嘉峪關城樓再送耔山

輓桐雲

輓竹儒

戊寅立秋作

中秋

中秋後一日作

秋風

戊寅九日

題畫

蜀葵

文殊山會獵作

重定新疆紀功詩

讀王霞軒必達年丈有懷朱伯韓先生之作感賦

贈周潤臣軍門

龍神祠祈雪數日矣長至之夕遂得微雪喜而有作

霞軒年丈疊予祈雪詩韻成詩數章比來望雪更勤和之

答邵陽魏某

酒泉留別

己卯

出嘉峪關作

贈玉門令張海樓

布隆吉爾城作

渡疏勒河作

紅柳園曉發作

長流水作

途中贈退菴

三道嶺泉上作

自梧桐窩至西鹽池山峽作

勝金口作

澤雅堂詩二集卷六

烏程施補華均父著

陪相侯東郊課耕

東郊雨初歇草綠煙冥冥草閒飛流合泱泱聞波聲長
渠雪翻白短柳風搖青旌旗轉陂隴掩映晨光明行春
相公出官吏方歡迎張幄野人聚勸酒山禽鳴坐觀二
十里田疇浩縱橫可憐回鶻亂荆棘無人耕竭來星宿
海上將新洗兵健兒好身手甯復誇西征相將負耒耜
趁此高原晴聯行寓軍法分水通農情鱗鱗萬畦闢付
彼窮邊民相公隆中廬湘波迴泠泠側想道光末稼事

澤雅堂詩二集卷六

親經營力作欣有獲頗似功名成身辭畎畝樂手定乾坤
傾省耕絕塞上素髮飄蕭生指揮萬貔虎道比農師
精明年洞庭渚萬里浮歸舫園林遂初志杖屨叨餘榮
東風酒泉郡父老瞻使星芄芄伯黍一碧春雲平
夜不成寐有懷故鄉諸子

官事亂神魂靜夜無恬夢泥中甘曳尾晚覺斯言痛生
爲樗櫟姿天全謝人用摧傾憂大廈顧汝非梁棟何爲
匠門雜繩墨苦難中譬彼林閒雀振翼輕一縱雲霓安
可決美蔭失清晔東皋春雨餘禾麥漸可種勤耕資飽
食庶免素餐諷孤燈聽殘角欲語與誰共鼙聲出僮僕

坐誤牛鳴鑾心疑山中人縹緲如鸞鳳早晚歸去來移
文君勿誦

城東

四月八日城東晴天桃穠柳春初生黃雲古塞一身遠
碧水空潭雙眼明銜草喜看邊馬逸題詩恰好野亭成
健兒身手閒無用盡叱烏犍趁晚耕

寄吳子常

懷君霄漢上絕塞那堪論裘葛供三伏華戎合一村山
如驕客瘦僧比長官尊唯有中宵月清輝似故園
故園介吳越寇盜十年平春事花連屋書聲月滿城溪

山自圖畫農女盡聰明滿目悲殊俗懷歸信有情

送王紆山赴疏勒二首

虛堂懸莫邪六月血風冷森然牆壁閒魑魅不留影路
人何慄慄甯與魑魅等平生有肝膽愛爾寒芒炯吾且
藏吾刀百怪已知警春宵忽龍嘯離別在俄頃臨行期
爛醉無奈孤懷醒莊生誇劍術斯義推未盡太剛誠易
折惜哉此鋒穎將爲繞指柔宛轉意難忍置君剛柔閒
光斂神愈靜一試百躊躇焉然中其肯

萬里旣無歸何妨更萬里西行絕太荒猶是乾坤裏古
人馳異域戰伐功可紀竭來戰伐餘亂絲待君理弱肉

供強食仍歲飽封豕昨日是前生令日生之始傷禽怯
鳴弓聞箏亦驚起幽囚別太陽對燭聊小喜養民如養
狙甯復矜鞭箠人狙兩忘猜宛轉隨所使火雲生馬頭
冰月出馬尾手挽崑崙波先爲洗泥滓葱嶺在天半東
望萬山底一髮酒泉城故人應在此

登嘉峪關城樓再送耕山

層樓倚天半屹屹百餘丈檐楹俯睥睨形勢踞首項臨
邊送行客扶掖始一上此身眞淩虛萬里失憑仗天荒
入悽睹路遠發哀想悲笳催落日晚色更蒼莽飄飄孤
雲飛浩浩積風響寒廳夜知歸掩冉燭初晃憂傷苦無

益對酒歌慨慷遐哉漢疏勒尙隸輿圖廣吾聞恆河濱
白帽多君長願君揚

天威持節更西往

輓桐雲

黃浦頻年白髮催葛巾藤杖意徘徊閒從驢背看山去
親向鯢身踏浪來憂

國尙餘籌海策歸田猶有著書才閒中歲月悠悠盡夾

袋摩挲上相哀

湘陰相國
將薦起之

文章經術亦專門繼體方姚大雅存自許千秋聊快意
誰憐萬里與招魂窮荒作客傷遲暮舊學無人共討論

銘墓尚煩垂死託濡毫未下已聲吞

敬甫書來君臨終以墓誌見託

輓竹儒

霓節雲幢下九閭靈風颯颯海潮奔方知天上神仙侶

卽是人閒忠孝魂願種松楸安父魄誓驅蛟鱷答

君恩冰天迴憶欵欵語鬚鬢如蓬入玉門

皆扶欄入闕時語

關輔書來墨未乾幾回開讀淚汎瀾

君行次潼關貽書言奉旨送部引

見有出使海外之役並擬陳情葬事畢入都

九重側席程期迫萬里遺棺付

託難心繞哀鴻愁夜叫

上書

眼穿孤隼刷秋翰招魂泉

上君知否尚作相逢握手看

六月七日同人祭於酒泉

戊寅立秋作

祈連三度見秋風烽火旋消驛置通新教不容流震日
舊章時復按乾隆忍拋赤谷

皇輿外未殪丹津別部中

聖主卻思軍賞急剖珪錫組已論功

竭來星海洗兵戈暘雨從時歲更和郡縣遠開狼望外
人民初聚馬流多虹霓隱隱騰金穴琮璧泠泠瀉玉河

聞道胡琴無限恨酒闌慎莫喚秧哥

回人呼婦爲秧哥

唐努山頭雪作堆支離漢語賈胡來尋碑合定華離盼
通市還勞駕馭才佔客谷中量馬去種人城裏貢貂回

烏梁海一帶蒙古向例貢貂

將軍第一安邊計莫遣芙蓉處處栽

塞樹關雲百戰場登高何處望家鄉
八千道路樓中月四十頭顱鏡裏霜
幕職聊堪依節鉞邊才端合出沅湘
故園兄弟書頻至爲道湖田半已荒

中秋

祈連山頂月三泛中秋觴嗟哉萬里眼對此團樂光團
樂復團樂灩灩旌旗旁節物亦供給邊聲良感傷酒酣
上陵阜回首東南望天宇夜澄寂但有煙鴻翔月從滄
瀛來近我垂釣鄉映我溪上屋清宵開小堂癡兒爭綠
餅嬌女著綺裳瘦妻方念遠裊裊燒鑪香殷勤託華月
飛度關山長關山同一照浩浩風露涼河漢亦西傾欲

濟愁無梁明年我東歸計及秋稼黃琴書命再設弓刀
喜全藏小堂聚笑語佳節羅酒漿娟娟庭外月曾照鐵
衣霜

中秋後一日作

天爲中秋月色微關山今夜發清輝雪光照野干巖曙
露氣橫霄一雁飛幕府事閒人語靜戍樓陰直鼓聲稀
明朝更說茗溪夢黃菊將花蟹乍肥

秋風

十畝謀歸下潁田五湖思泛總宜船秋風定惹閨中笑
孤負鱸魚又一年

戊寅九日

我憶敷山作重九題詩氣壓老劉豪黃花香插盈頭蕊
紫蟹肥持左手螯兄弟故園應望遠風雲絕塞更登高
無情知有所連雪專爲征人染鬢毛

題畫

青山窈窕樹參差一舸飄然載酒宜莫待江湖波浪惡
收帆好及順風時

蜀葵

綠葉紅花爛漫妝臨風未送一痕香當時偶傍階除種
不道秋來爾許長

文殊山會獵作

文殊山頭搥戰鼓文殊山下趨獵戶獵戶前導官軍隨
十人爲隊五人伍旌旗忽過山之隈平沙百里圍場開
祈連積雪壓天半曉日烘作紅玫瑰官軍左右如牆立
聲呼相聞勢相及腰刀試斫石火飛臂槍欲熱銅丸急
龍眠將軍老更雄戰馬怒出官軍中塵埃不見萬蹏蹴
但驚兩耳風蓬蓬萬蹏倏作迴颿轉狐兔狂奔膽殘喘
避人顛倒投人叢迎以刀槍復誰免仰天槍作霹靂鳴
雙雉墮落羣喧爭更射黃麋走墟莽窮搜赤豹穿巖窟
行軍司馬最文弱緩轡歸來汗如濯燒毛炙肉羅酒漿

呼取將軍恣大嚼王師西定崑崙山島酋海族仍冥頑
荒園狐兔那足數健兒身手猶難閒將軍慷慨聞我語
酒闌脫劍還起舞要當碧海捕奔鯨肯學藍田殪哮虎
重定新疆紀功詩

皇帝紀元某月某日上相左侯西事陳說曰新疆者關
隴外郭臣定關隴餘寇亡遁或嘯於城或嘯於社跳踉
東西或噬於野浩罕別部曰安集延盜八城居厥有歲
年土回如羊客回如狼安夷如虎牙爪怒張羊爲虎食
鳴號失計狼爲虎役憑依得勢東窺關隴扞禦唯臣吁
嗟蒙古狼虎與鄰唯此蒙古

神京肩背肩背創深腹心患大豈不出師將懦士疲賊
掠而飽軍潰而飢旣懦旣疲旣飢且變守之不能矧與
言戰願奉

威命絕塞是揚籍二萬里還之職方侯任其事

帝下其議合慮同謀凡百在位或曰道遠或曰敵堅或
曰役久或曰財殫或曰棄之閉關以拒或曰封之裂土
以處

帝謂不然新疆如田

聖祖耕之

高宗獲焉

祖宗所貽子孫治之厥或荒穢芟之夷之乃授節鉞乃
專征伐乃峙芻糧乃練兵卒有蹇者贏有禿者駝千頭
萬頭運糧若何運糧自東陰山雪汭運糧自北大漠風
怒俄夷助順運糧自西大麥小麥百貨以齎運糧如山
如陵如阜以戰可戰以守可守湖湘子弟帕首韡刀猛
氣噴薄崑崙不高英英劉公實爲軍主接士而文馭將
而武二年三月侯至酒泉劉公奮呼負矢以先伊吾陟
高渠犁就坦將欲急攻先示以緩羣寇狂獬厲乃戈矛
初生之犢狎虎如牛車師後庭厥有牧地羣寇據之顧
盼形勢割禾於野阻水於河營其夷曠壘其嵯峨劉軍

之緩劉軍之急肉薄先登血飛橫入大夷哀啼如鷹搏
雞小夷駭竄如狸捕鼯或解其肩或截其脰萬怒莫當
一兇不漏叢爾昌吉猶穴賊徒忽降而拒進退如狐金
劉合軍左攻右截降則狙繫拒則犬磔山曰達坂安夷
以城南疆喉項欲以死爭劉軍之來賊吽民笑九地鳴
笳九天飛礮飛礮之火千帳焚燒屍骸撐拄額爛頭焦
遂襲高昌張徐來會昆吾之刀以刈蓬艾回首慄膽安
酋亡魂有兵在頸西走何門天狗夜墮雷聲震震軍吏
謹呼安酋殞命安酋之子海拉最能胡里殺之以弟代
兄英圭黎夷庇其黨羽萬里請降侯拒不許遂決勃海

遂鍾輪臺土爾扈特狼狽歸來驅茲風掃溫宿電逐莎
車于闐不亡一鏃疏勒之賊羣游益鷲翻城以應蔗腐
在心胡里亡命回酋與俱獲其孥妾或釋或誅窮追魁
黨越竟而逃彼納國賊我重邦交投甲道旁降者十萬
哀哉土回脅從非願紅旗獵獵飛度關津

宮門曉啟捷書以聞

皇帝曰吁天相朕國山川神祇佑助之力

皇帝曰吁戎亂以甯告於

穆宗在天之靈

皇帝曰吁朕德何有知人善任惟

皇太后

皇帝曰吁相臣竭忠愛及將士以爵酬功觥觥我侯拜
首稽首疆宇旣復宜善其後迺命文吏旦暮招徠逃崖
竄谷子遺可哀民孰無居壘土庇之民孰無食措廩餼
之爲民度田賜牛以耕三年出賦輕之又輕爲民都水
隄堰是列視歲旱澇以蓄以泄課棉得絮課桑得絲織
以爲衣禦寒有資羣玉之山五金之穴苟利於氓屬禁
勿設阿渾伯克沿習不除柔以禮義活以詩書乃建城
郭乃分郡縣化外爲中比回於漢華離區脫與俄畫疆
先之歸地繼以通商新疆之民天曰再覩民之永思

高宗

聖祖以屏關隴以障蒙古遠夷心驚浮議氣沮惟侯之
忠忠邀

天斷惟侯之義義激士戰惟侯之勇勇除寇悍惟侯之
仁仁拯民難天生我侯中興之賢粵賊竄粵聚而殲旃
攻擒攻回頭白臨邊功成三稔金甌復完華戎喁喁仰
天而祝

皇帝睿冲倚我耆宿杖國杖朝百年康樂

九廟之安四海之福

讀王霞軒必達年丈有懷朱伯韓先生之作感賦

滄浪亭畔水蕭蕭

咸豐己未十月事

記把清尊話寂寥
蔡賊縱

橫知李祐韓門零謝有清樵
夢回西掖陳封事老去南
屏泣暮潮杳杳蒼梧鄉國遠
羈魂猶待楚臣招

贈周渭臣軍門

將軍昔走青城西猛氣颯颯如怒猊
金堂赤岸騁馬蹏健兒騰躍隨旌旗
幽巖密箐途不迷生縛猓猓疑縛雞
霜刀浴血頭顱飛乞活時作嬰兒
唬烏蒙一髮天淒淒寇氛高與峨眉齊
雄師又向黔中移千山萬山驚鼓聲
十年苗亂民流離層城燒邑哀子遺
捕苗捕猓兵家機妖腰亂領誅纍纍
跳刀走戟誰敢爲牂牁江水綠瀰瀰

蠻花犵草春風肥歸來一卧瀟湘浦讀書忽效儒生苦
自賦清詩贈蘅杜沙鷗水鴨心相許勢交烜赫避官府
情話殷勤過農戶酒酣慷慨還起舞刀瘢箭孔手摩撫
宮中

聖人恩將軍徵書飛渡嫺山雲間闔曉趨

天語溫

命擁幢麾臨玉門祈連積雪無冬春如苗如猓多番民
牦牛千頭羊萬羣槍鳴霹靂能防身怒卽爲獸喜爲人
撫以威德桀而馴邊士驍勇無與倫塞馬骨格皆嶙峋
長城之倚古所云況今西師成大勦萬騎追賊踰崑崙

莎車疏勒亡游魂星海如鏡清不渾拂絲身毒將來賓
將軍裘帶且好文談笑自足傾遠人

龍神祠祈雪數日矣長至之夕遂得微雪喜而有作

畢竟龍公老解慚瓊花試手落穠穠剛逢至日甯非瑞
小舞迴風尙未酣萬里天威行塞外三冬地氣似江南
明年種麥家家早已喜千畦潤澤含

霞軒年丈疊予祈雪詩韻成詩數章比來望雪更勤和
之

野鶴丰姿老不慚脩翎對月舞穠穠詩如曉鼓催逾急
雪似輕兵戰未酣天眼定憐關內外農心遍繞畝東南

聞情說我孤山夢三百官梅玉蕊含

答邵陽魏某

帝恩光舊物天亦厭諸戎慷慨三軍帥飛騰萬里功老
逢兵氣靜喜作凱歌工慚愧韓司馬千秋智勇同

邵陽文采地吾愛魏先生遠塞傳新作諸孫有令名天
驕今震疊

聖武昔經營戎政徵家學期君識議精

酒泉留別

己卯

葱嶺煙光渤海瀾酒泉還作故鄉看側身天地籌邊急
回首風雲接席難文酒尙思三載樂干戈誰撫萬家殘

北崖花發春流活應算征期一倚闌

慷慨安邊屢上書出關翻覺意躊躇天威已及要荒外
風氣猶存渾沌初開濟有心憂不逮漢唐無策欲何如
故園兄弟應相笑孤負鄉村下澤車

出嘉峪關作

健兒佩弓刀駿馬施鞍勒問君將何之遙遙溫宿國
皇威軼漢唐郡縣分絕域開濟諒非才勞役甯敢恤暮
宿嘉峪關別酒破蕭瑟凌晨出西門送客旌旗密悲風
浩浩來瘦日荒荒出登車一顧盼淒然天地色親朋道
旁揖去去語言塞有淚忍不流百痛攪胃臆咄哉丈夫

雄作此久淒惻區區萬里懷未許陳班識干戈驚吾民
相與事休息下服諸戎心上揚

羣聖德

贈玉門令張海樓

昔歲青油幕張髯最老成今來邊邑苦人說宰官清花
海塞逾澈沙山靜不鳴相逢拚一醉各各鬢絲生

布隆吉爾城作

空城曠蕩無人煙百年老樹高參天樹間野屋卽官舍
風生四壁瀏瀏然昔時上將屯貔虎今日寒林穴狐鼠
宵長夢短雪打窗卧聞戰鬼淒涼語

渡疏勒河作

雙輪迅轉四蹕急將開尙合春冰溼車聲鏗鉤冰窸窣
傍岸招邀百人立龍公河伯相驚泣車中者誰朝睡醒
起看凍日浮波出

紅柳園曉發作

欲落未落沙頭月雄雞一聲客車發舉帷恰值西北風
鋒鏃棱棱刺人骨徒隸相隨皮肉皴長途瘦馬嗟酸辛
重衾襖帳夢魂煖誰信春宵寒殺人

長流水作

長流水流向東東流入關塞乃與黃河通黃河九曲赴

滄海海邊城郭吾家在流水繞吾家春風桃李花家人
汲流水流水味變苦知帶客心來萬里到鄉土

途中贈退菴

蕃劍胡纓賦壯游誰知萍梗又飄流百年易盡君將半
萬里無歸我亦愁西徼風沙隨策馬南湖煙雨負登樓
還須一散窮途恨攜手崑崙最上頭

三道嶺泉上作

嗟哉君子泉發我臨流歎潏洄斥鹵中清冽不能亂尋
源始涓滴觀委遂浩瀚能消萬夫渴獨特一味淡大磧
渺茫茫沙石相爲半富媼體瘠枯疑與湯同患茲泉生

者機脈絡資流貫功名出荒域在遠亦何憾中冷天下
一詞客徒品玩

自梧桐窩至西鹽池山峽作

一峯洶湧勢忽若萬浪掀一峯馳騁狀又作羣馬奔一
峯匠初斲刀斧餘血痕一峯僧久枯塵土封皮皴一峯
悄作奇鬼立一峯猛似惡獸蹲磊磊地之瘦濯濯天所
髡四遮悞入井對豁疑闢門隘轉鬪兩鼠陡下愁狐猿
臨晨每晚曙待夕常先昏碎石塞細路尖利不可捫驚
沙起蹴蹴急火迸轉輪孤進勇漸怯淺汲清易渾女媧
鍊石補天缺壚炭下積崑崙根千奇百險萬萬古蠶叢

羊腸安足論

勝金口作

千家好村落亂後百家存
雜樹斜通路春流半入園
俗仍胡服舊民識漢官
尊但苦停車問啾啾盡鳥言